

摘藻堂四庫全書薈要

集部

欽定四庫全書薈要

集部

明詩綜卷五十六

七

詳校官編修
臣汪鏞



欽定四庫全書薈要卷二萬五百二十九

集部

明詩綜卷五十六

翰林院檢討朱彝尊編

羅萬化 一首

萬化字一甫會稽人隆慶戊辰賜進士第一歷

官禮部尚書贈太子少保謚文懿有世澤編

靜志居詩話唐宋科目繁多至明而始終所重
惟甲第志科名盛事者首述吉水莆陽而於越
山陰自諸文懿大綬而後榜五發邑人居其三
焉傳聞三公俱同席硯之友不可謂非盛事已



擬此日不再得

落景無返輪奔星少迴光綠髮不戀人轉眼化為蒼所
以志士心努力及方剛恒恐歲遲暮蘭蕙不得芳膏火
還自煎山木亦自戕我謀一以乖終身失其臧大道本
希聲至人貴含章豈其魚目珍而登君子堂登高豈無
梯濟深豈無航愚者貴速至聖人寶其常虛牖展素書
古人未云亡無為守躊躇徒貽過時傷

黃鳳翔 三首

鳳翔字儀廷晉江人隆慶戊辰賜進士第二歷官
南京禮部尚書贈太子少保謚文簡有田亭草

告歸發潞河作

方朔恒苦飢相如常病渴明時許乞身初衣辭魏闕革
車逐扁舟長河接溟渤舳舻爭唱呼鷗鷺閒出沒帆影
日外落棹歌津頭歇舉酒酬暮雲卷簾對夜月悠然萬
里心頓與江天豁

穆宗莊皇帝發引挽歌

垂衣方在御憑几那堪聞雨暗虞淵日星沈華渚雲周
宮開翼室漢曲罷橫汾百辟趨蹌地傷心望紫氛

萬歷宮詞

霜毛鸚鵡傍雕闌巧舌依人似結歡白髮宮娃空墮淚
先皇覓到不曾看

趙志皋 二首

志皋字汝邁蘭谿人隆慶戊辰賜進士第三歷
官少傅兼太子太傅吏部尚書建極殿大學士

贈太傅謚文懿有澈陽詩集

早發錢塘

曉霧兼天白，秋風一葦輕。
湖吞漁浦濶，沙涌固陵平。
隔座吳山送，揚帆越嶠迎。
蒼茫思無限，天外忽鐘聲。

贈太僕何石川

丈人三徑傍城隈，不厭鄰翁日日來。
雙鶴竹間迎客舞，一尊池上為誰開。
采芝合共商山老，作賦仍多洛社才。
自笑登樓倦懷土，暮天回首重徘徊。

王家屏 六首

家屏字忠伯大同山陰人隆慶戊辰進士歷官
禮部尚書文淵閣大學士贈少保謚文端有復
宿山房集

詩話宋制祖宗翰墨儲藏於玉堂之署觀陳騏
中興館閣前後錄道君墨跡俱存此康譽之得
題年年花鳥無窮恨盡在蒼梧夕照中之句也
迨元而奎章宣文之閣舊典不改明則藏之大
內詞臣末由覩矣萬曆九年帝御文華殿宣召
入直史臣五人文端居首其餘修撰則沈公懋
孝張公元忭編修則劉公元震鄧公以讚也既
進見示以景陵御筆元兔圖園以淡墨作滿月

胎上有桂子垂枝下藉輦草兔居其中並臻妙境諭諸臣題詩於軸并得用私印識之閱三日詩成進御自首輔張文忠外凡三十有五人當日諷詠優游不事促迫綵花銀葉賜予便蕃自永宣以來詞林盛事遇此罕矣長陵四馬詩世傳為江陵作今從館課集本正之文端立朝侃侃不阿因一諫官力爭去位風節固不可及詩亦雍容和雅不失正始之音

恭題文皇帝四駿圖

龍駒 鄭村壩大戰胸著一箭都指揮楚楚拔

箭

天馬徠翼飛龍蹄削玉耳垂筒碧月懸雙頰明星貫兩

瞳文皇將士盡罷虎復有龍駒助神武流矢當胸戰不休
汗溝血點桃花雨壩上摧鋒第一功策勲何必減元戎
君不見虎士標題麟閣裏龍駒亦入畫圖中

赤兔 白溝河大戰胸著一箭都指揮伊蘓特
穆爾拔箭

雷鎬鎬北軍來赤兔走黃雲開搜身超夾澗策足絕浮埃
白溝原頭振鞞鼓貫陳穿營猛如虎穆王八駿詎為奇
昭陵六馬應難數百戰間關未解鞍箭瘢還向畫圖

看只今四海昇平日誰識當年締造難

棗騮 小河大戰著兩箭胸一箭後右曲池一
箭安順侯托和齊拔箭

紫騮馬金駱月朝刷燕晡秣越俶儻精權竒超驥走滅
沒當年萬馬盡騰空就中紫騮尤最雄戰罷不知身著
箭飛來祇覺足生風北風獵獵吹原野長河水漸血流
赭誰言百萬倒戈中猶有彎弧射鈎者

黃馬 靈壁縣大戰後右曲池著一箭指揮竒

爾拔箭

軒后興應龍翔駕天駟乘飛黃迴頭看紫鷲顧影失超
光君王神武古來少萬里煙塵一劍掃馬蹄蹴處山為
摧何論陳暉與平保揚鞭渡淮淮水清金陵父老壺漿
迎從此華陽休駿足山河重整泰階平

初入翰林自述

生平未知學世路方多歧古人已不作古道猶可追願
言對青簡澹慮澄玄思宇宙皆吾事一念安可欺譬彼

機中素皎潔防其緇譬彼山下石孤貞堅自持文章乃
末技富貴非吾期出入感榮邁朝夕承師資遠心在霄
漢努力酬明時

玉河新柳

水繞沙隄曲春看御柳眠柔條輕著雨嫩葉暗抽煙影
落波間細陰垂檻外偏亭亭依漢苑遲日待鶯遷

沈一貫

一首

一貫字肩吾鄞人隆慶戊辰進士歷官少師兼

太子太師吏部尚書中極殿大學士謚文恭有

喙鳴集

望西城宮殿

奠殿重開寶歷春竹宮長鎖屬車塵煙霞自護祈年閣
星斗曾傳醮夜辰帳裏流蘇間甲乙爐中寒火憶庚申
茂陵松柏蕭蕭老無復相如賦大人

朱賡一首

賡字少欽紹興山陰人隆慶戊辰進士歷官少

保兼太子太保吏部尚書文華殿大學士贈太

保加贈太傅謚文懿有集

詩話明制閣臣始入東閣次進文淵閣武英殿謹
身華蓋後為建極中極獨虛文華殿不拜惟永樂
間權謹以孝行拜斯殿學士此後則文懿公也是
時定陵有意爰立二人先太傅文恪公暨馮文敏
琦也蛟門閣老亟以密揭止帝曰此二臣皆美器
當老其才用之乃改命文懿及文懿入賁捧各官
爭論礦稅難以裁答於是相傳以政府為苦
海矣文懿詩不載集中僅從館課錄得一首

薊門行

曠騎窺青海天兵出薊門白草邊塵暗黃沙塞月昏悲

茄風外曲哽咽不堪聞

于慎行 六首

慎行字可遠更字無垢東阿人隆慶戊辰進士
選庶吉士授編修歷修撰侍講左諭德侍讀學
士陞禮部侍郎改吏部拜禮部尚書入直東閣
卒贈太子太保謚文定有穀城山房集

詩話東阿格律和平當正聲微茫之時能為是調即以詩高選亦堪作相

晉陽男子行

隆慶己巳太原丈夫化為女子歌以識之

太原有男子壯烈世所無身長九尺餘白皙好眉鬚自
負良家子募作材官徒腰中轆轤劍橫擊當路衢并州
惡少年見之伏且趨一朝覽青鏡侘傺空堂隅三日不
出戶忽然見彼姝綽綽芙蓉顏盈盈玉雪膚蛾眉娟且
長高髻墮馬梳脫我金鎖甲繫我繡羅襦掛我白貂帽
珥我明月珠委心懷嫵婉不惜健兒軀昔為雲中鵠今
為水上鳧昔者一何厲常闕十石弧今者何柔曼巧笑
傾城都仰視浮雲馳變化不須臾茫茫窺元運玄黃無

乃渝世人但云好不必稱丈夫

過雨

五月不知暑虛空颯似秋殘虹掛溪水片雨過城樓遠
樹斜陽駐深山夕翠流晚涼思枕簟絕愛北窗幽

秦淮

秋月秦淮岸江聲轉畫橋市樓臨綺陌商女駐蘭橈雲
裏青絲騎花間碧玉簫不知桃葉水流恨幾時消

送朱養淳太史冊封周藩

蓬萊闕下五雲飛
桐葉封函出帝畿
漢苑花香隨使節
河橋柳色上征衣
天臨玉署恩偏渥
星近銀河夜更輝
試向天津橋上望
銅街無處不芳菲

送張洪陽學士請告南旋

長河南下水曾波
吳楚青山枕上過
行到潯陽江口望
應憐秋色故園多

少年行

錦帶珠袍綠臂鞬
相逢盡說富平侯
南山夜獵春城晚

繫馬新豐舊酒樓

陳于陞一首

于陞字元忠南充人隆慶戊辰進士歷官太子
太保禮部尚書文淵閣大學士贈少保謚文憲
有萬卷樓橐

宣廟御筆馬

寶繪傳神駿權竒尺素收蹄攢雙碧玉文散五花虬赤
汗當沾臆黃金為絡頭天閑今萬匹何必按圖求

張

位一首

位字名誠南昌人隆慶戊辰進士改庶吉士授
編修遷司業以糾江陵奪情謫徐州同知後累
官少保兼太子太保吏部尚書武英殿大學士
謚文端有叢桂山房彙橐

詩話文端以持正忤江陵詩頗有憂危之語其
詠射鵲云方寸能幾何當此亂鏃投有感其言
之也既罷相於東湖杏花村建閒雲樓吟眺自
娛晚探青原之勝汎舟螺川野服篋車登覽竟
日老僧不識為宰相題詩懷鄒魯瞻門人胡
廷宴守吉安從寺壁見詩始知之是亦佳話

七夕

塞月催砧急，天風襲袂深。
星河良夜色，牛女隔年心。
莎徑流螢度，花陰促織吟。
平生江海意，荏苒二毛侵。

裴應章一首

應章字元閣，清流人。隆慶戊辰進士，歷官南京吏部尚書，贈太子少保。謚恭靖，有嬾雲集。

豐嶺即事

倚杖危峰上，煙霞嶂幾重。
逶迤盤古道，絕勝引仙蹤。
露

滴晴天雨雲低半嶺松蓬壺何處是天際一聲鐘

范謙一首

謙字含虛豐城人隆慶戊辰進士歷官禮部尚書贈太子少保謚文恪有雙柏堂集

初入翰林自述

聖人啟元運應龍協昌期萬物快先覩而我逢茲時抱策獻天門鴻漸修羽儀木天肆宏敞玉軸陳參差石渠發中秘虎觀探幽竒淵源接師友得失隨箴規分陰期

共兢古道還力追願言謝紛華兼以息驅馳但令微忠
效無求虛譽垂庶幾大造化於以酬毫釐坐見乾坤泰
我亦贊無為

習孔教

一首

孔教字時甫廬陵人隆慶戊辰進士選庶吉士
歷官南京吏部右侍郎

將進酒

將進酒客莫辭玉交杯金屈卮主人勸客揖且讓客言

我飲本無量有如法宮置酒監在前史在後此時徑醉
不及一斗州間之會六博投壺男女雜坐盱眙歡呼爾
時醉可兩壺日暮酒闌合尊促席履舄交錯杯盤狼藉
羅襦襟解微聞薜澤當此時也能飲一石歛戲乎酒極
則亂樂極則悲萬事盡然高陽之徒安足為書有豐刑
亦有酒誥舌出禍入君子所悼主人休矣職思其居三
爵不又言毋我渝

田一雋 一首

一雋字德萬大田人隆慶戊辰進士歷官禮部
左侍郎有鍾台遺藁

遲鄭郎不至

幽齋淨朝塵崇館紛晝靄涼葉陰已深疎花落猶在美
人來不來搔首空相待渺渺望河干青山出雲外

韓世能一首

世能字存良長洲人隆慶戊辰進士改庶吉士
除編修歷修撰侍講右諭德陞國子祭酒南京

禮部侍郎召入兼侍讀學士有雲東草

送友人南還

垂柳千條拂御溝
上林春色鳳池頭
如何張翰多歸興
不待秋風已倦遊

沈思孝

四首

思孝字純父嘉興人隆慶戊辰進士累官都察院右都御史兼兵部侍郎贈太子少保有行成
郊居西征陸沈諸豪溪山堂吾美堂等集

詩話先生封事尤觸江陵之怒杖畢即加錄鑠復下獄三日始僉解發戍既抵嶺南巡撫欲殺之以媚政府遽以尺符召之行至思平先生袖匕首示縣令曰巡撫必欲殺我我當與俱斃不然伏尸軍府中令天下士大夫皆知巡撫所殺也縣令密以告巡撫得不死蔡副使文範作壯哉行送之其歸也胡元瑞贈詩云豈菘花前千里夢枕榔樹下十年人先生頗好鑒賞書畫言者遂劾其以千金市王右軍真蹟一卷南箕貝錦可以意成也詩入瑯琊四十子之列晚交姚叟士彝未免

間作磬牙語

喻邦相同俞羨長至集恕醉軒

白雲邀上客黃葉繞貧居缸面沽來酒槎頭釣得魚山

川連越絕雞犬數秦餘一日千秋意相看老不踈

思家

長卧鳳城隈鄉心日夜催小人猶有母明主漫憐才木
葉千山雨江湖八月雷倚閭秋欲盡底事不歸來

清寧兩宮灾臣督諸軍入救上使小黄門賜以肴
四合酥與果稱是中有鳳仙橘小紅梨甚佳乃藿
食者所未嘗敬賦此紀之

春盤分尚食天語遣黃門橘豈維揚貢梨堪大谷論股

肱悲未竭口腹媿知恩
獨荷焦頭賞能無負至尊

出都門

天高落葉繁
匹馬上東門
固寵寧臣節
完名是主恩
青雲震闕迴
綠野幾家存
滿篋匡時草
攜歸覆酒尊

賈三近一首

三近字德修
嶧縣人
隆慶戊辰
進士
選庶吉士
改授吏科
給事中
轉戶科
都給事中
遷太常少
卿
改督四夷館
歷大理
左右少卿
南北光祿寺

卿以右僉都御史撫保定入為大理寺卿轉兵

部右侍郎有東掖漫橐

于無垢云石葵歌詩
清爽疎宕咳唾立成

冬日登嶽

遊目高寒處羣山擁岱宗登封迷漢草徙倚有秦松萬
壑煙嵐合諸天紫翠重肩輿明月下上界已聞鐘

邵陛 一首

陛字世忠餘姚人隆慶戊辰進士改庶吉士歷

官刑部左侍郎

過拜將臺懷古

千載遺蹤表故臺，殘雲縹緲夕陽開。
三川佳麗興王地，百戰勲名大將才。
此日江山空草木，當年壁壘半蒿萊。
登臨不盡英雄恨，風急寒沙過鴈哀。

沈懋孝一首

懋孝字幼真，平湖人。隆慶戊辰進士，改庶吉士。
歷南京國子司業，謫兩淮鹽運司判官，起河南
巡撫，未任有淇林雅水。

詩話晴峰樂府句摹篇做不脫歷
下窠白餘體斐然能於同中見異

北固登望

北固樓前一笛風碧雲飛護建康宮江南二月多芳草
春在濛濛細雨中

朱孟震

四首

孟震字秉器新淦人隆慶戊辰進士除南京刑
部主事歷郎中出知重慶府陞河南按察副使
累官通政使以右副都御史巡撫山西有郁木

生全集

任少海云使君詩閑逸瀟灑了無塵俗氣 陳于韶云秉器才情婉附流調

發若孤桐朗玉自有天律 張助甫云秉器詩

爾雅深厚緣情達理 吳明卿云秉器負用世

才以餘力為詩諸體錯陳意匠所極才亦副

之 陳玉叔云秉器詩本於才體氣高妙

詩話秉器津津以詩家自許其在南曹結清溪

社一時名士聲應氣求所緝楮談續談餘談述

先詰之舊聞綜同人之

麗句可謂好事也已

和答正甫

幽意苦不愜清歡良未期如何汾水上忽枉故人詩芳

草王孫路朱華帝子池相思隔年歲河漢正高垂

哭孔汝錫先生墓

殘歲龍蛇逼新阡雉兔過露隨朝槿盡風入暮蟬多坐
失千鍾酒情傷九辯歌夜臺無白日一慟欲如何

春日金沙寺訪羅孝廉元我

春水金沙是舊遊春風黃鳥況相求馬蹄一逕穿雲入
花氣千林帶雨浮詞客雄文巴蜀檄故人清興剡溪舟
草堂蹤跡今猶昔好為狂夫十日留

謁張桓侯廟

英姿颯爽氣雄哉恍惚晴霄風雨來一代君臣元伯仲
千秋祠廟倚崔嵬乾坤已限三分業熊虎空懷上將才
正是雲安春月夜杜鵑啼徹不勝哀

龔

勉

一首

勉字子勤無錫人隆慶戊辰進士除嘉興知縣
以憂歸補吳橋知縣陞南京刑部主事轉戶部
員外進郎中出知嘉興府遷浙江參政轉按察
使調山東遷浙江右布政使有尚友堂集

彭子
殷云

子勤詩整暢
可方錢劉

送王會泉武庫出守永州

仙郎戎政擅才名簡命熊幡向楚城
車騎舊瞻司馬節
檐帷新識使君旌
九疑南接湘江遠
五嶺東連粵路平
遙想行春風日好瘴煙消盡百花明

蔡文範十首

文範字伯華瑞州新昌人隆慶戊辰進士歷官
廣東布政司叅議有縉雲齋藁甘露堂集

詩話青門近

體雄渾絕倫

自瀛德至東昌道中雜詩

聞道張秋決先朝慮獨深為山名戊巳奉使失卒壬地
控支祈鎖天寒象罔沈誰知神禹跡疏鑿本無心

岳州馮觀察見招

澹澹鋪湘水依依見武陵雲隨天不動川靜水凝冰
魑魅愁神鼎魚龍怪佛燈夜深清梵徹何異普陀僧

太和宮

疆域連秦塞星辰入楚都英靈天地啟宮闕古今無禪
草諸儒遜玄功萬國趨祠前瞻阜燾曾說贊文謨

送庫部朱陽和備兵甘肅

陰山雪墮紫貂裘使者行邊大漠秋陝右長城班定遠
胸中武庫杜荊州風吹獵火通甌脫遂奏梅花落隴頭
哈密至今無敢論知君躍馬看吳鉤

紅心驛值雪

雪色初驕冷萬家那堪風急更迴斜來從朔北還兼雨

去到江南定結花沙上紫騮嘶不度愁邊青鬢忽先華
荒村日暮平如練破却寒光數點鴉

遊南岳 二首

縹緲仙臺紫氣浮煙籠玉座儼垂旒地包荆楚標南紀
江合沅湘向北流牲帛千秋周祀典衣冠五月舜諸侯
塵緣未斷慚仙骨金簡雲書何處求

赤帝高居小梵天衆峰羅列擁階前秋經絕壁風雷起

有風醉倚雙臺日月懸
上有望日望月二臺誰道人騎黃鶴去我

今寒抱白雲眠莫言此夕非冲舉已隔人寰丈九千

誌載

祝融峰高九

千丈有奇

寶應湖

湖濶疑無地堤長亘若虹孤舟數點雨殺却日南風

望白鶴嶺

百里初見近十里轉見遠絕頂不分明白雲時舒卷

溪漲發建陽

白日欲沒雲濛濛建陽城外雨澆空溪邊怪石不知數

一夜走入洪濤中

顧大典 三首

大典字道行吳江人隆慶戊辰進士歷官福建提學副使謫禹州知州改開州有清音閣集

得山東觀察報留別省僚

肅肅晨風吹明星帶徂兩平生攜手俱今乃殊風壤大江一以遠日夕春潮長憶奉南皮游良時清尊賞華篇想遺則淵調懷餘響朋僚既雨散世路即塵鞅去去不可追臨風徒曠怳

苕溪春日

苕溪春深春欲歸
柳絲拂地梨花飛
客子辭家已三月
春風初換越羅衣
羅衣競試春江曲
花外鶯聲斷還續
春心羈思兩相催
愁見天涯春草綠
春草年年伴客程
扁舟明日又孤征
故園回首春雲隔
江上春風空復情

送秦郡倅還楚中

一朝辭簿領千里返
江湘棄置君何罪
離羣我自傷春
風過夏口秋草卧
衡陽為報南來雁
音書好寄將

沈位 三首

位字道立吳江人隆慶戊辰進士改庶吉士授

檢討有柔生集

詩話虹臺詩麗以則惜不
永齡中秋結語殆成讖也

十二月二十一日獻俘

睿德通中夏天威震北隅遐方歸正朔款塞獻新俘清
廟陳宏業彤庭顯秘圖五兵原不戰巨寇已行誅將相
多酬賞寰區盡大酺小臣叨侍從率武詠神謨

中秋

秋光長與翠華連
况是中秋更可憐
城闕影高雲裏見
芙蓉露冷沼中妍
誰家笛弄江南曲
幾處鴻飛塞北天
此夜清輝應莫負
人生能見幾回圓

漁陽春望

二月春方半
冷風日正長
陌頭看柳色
忘却 在漁陽

張鏜 一首

鏜號石渠吉安永豐人隆慶戊辰進士除東莞

知縣升南工部主事歷員外郎中出為湖廣按察僉事轉貴州參議

寄艾和甫謫戍西寧

荆南偶接故人書為悉關門近起居萬里獨看營外月
孤身誰念釜中魚辭劉徐恕心元苦折檻朱雲願不虛
秦地日聽邊塞曲楚歌相和調何如

喻均四首

均字邦相新建人隆慶戊辰進士歷官天津兵

備副使有山居集

陸中丞移書促入郭有事田間詩以陳情

龐公願負耒陶令甘荷鋤外物既不干誰能逸其軀朝
夕課童僕黽勉在田廬心事異昔人蹤跡與之俱吐嗟
不逢年高原化為渠穡事良已矣種豆山一隅羣雀苦
交啄持竿為毆除詎意小臧來乃接中丞書要我入城
郭高義有誰如顧念山中人生事各有須寧能舍田畝
忽此升斗儲殷勤謝來意禮數寬樵漁

春暮宿大觀樓簡士功及二三知己

閒居不適意觸事增煩憂振步出西郭登君江上樓滄
波漲初闊綠樹陰已稠煙雲綴遐岫蘭茝盈芳洲迴覺
心迹清轉見身世浮徘徊未能去衾枕聊淹留既以自
怡悅因之報舊遊

送方子及入計

凝霜沾浦樹冉冉歲欲晏君子意如何垂老仍薄宦一
卧艾子城六見秋花綻月米分故人日食藜與覓高志

慕翔鸞卑棲託斥鷃發軌謁承明蚤晚流皇盼白首感
睽離追餞臨寒澗握手慘無言側睇雲間雁

請告書懷

夙昔浮雲意微官久欲休蹉跎身漸老丘壑願方酬海
日猶殘暑山風欲度秋盈盈河上水萬里送歸舟

方 沆 二首

沆字子及莆田人隆慶戊辰進士歷官雲南提
學僉事謫寧州知州有猗蘭堂稿

朱秉器云子及詩非大厯

貞元以上語不道謝山子云
子及心境高妙有天然之趣

秋汎

山合松楸晚沙寒橘柚秋坐看魚鳥近歷歷鏡中遊

次長沙懷賈太傅

楚雲萬里望京華賈傅南遷路未賒誰料逐臣今更遠
春風三月過長沙

唐文燦一首

文燦字若素漳州鎮海衛人隆慶戊辰進士除

行人歷官廣西按察僉事有鑑江亭集

大行皇帝輓歌

憶昔河清日流虹叶瑞徵運隨真主轉紀逐盛時蒸七
世觀新廟千秋奉永陵耿光長照耀史冊紀中興

郭莊一首

莊字子益鞏昌徽州人隆慶戊辰進士改庶吉
士授山東道御史督學南畿

賦得謁帝承明廬

丈夫重意氣束髮事周遊挾策日坎壈西風吹敝裘一
朝際風雲謁帝來神州出入承明廬交結盡英流雙闕
聳雲漢朱旗夾道周翱翔供奉客錦帶佩吳鉤相期樹
勲名寧論沈與浮君看黃鵠志不為稻粱謀

帥機一首

機字惟審臨川人隆慶戊辰進士歷官南京禮
部郎中陞思南知府謫兩浙鹽運司副遷南京
刑部郎中有膳部集

秋懷

八月金氣深蕭瑟叩虛牝梧楸半離披朱華日就隕風
急度離鴻氣嚴感飛隼皎月正舒遲義輪漸縮窘磻聲
動四鄰薄寒侵席筍清景誠足嘉惜此歲道盡况復愴
松楸欲賦思歸引

鍾庚陽 一首

庚陽字長卿秀水人隆慶戊辰進士除太平推
官入為大理評事遷工部主事歷員外郎中出

知鎮江府謫知廣德州終刑部員外有焚餘集
劉在南直指遷郴州余亦謫守廣德同發潞河投

贈

繡衣使者下蘭臺愁說雙旌潞水開自是聖恩寬逐客
却從謫宦見仙才山過衡嶽孤帆轉路入瀟湘鴈影回
余亦南行賦歸去秋風天末幸追陪

唐邦佐 二首

邦佐字惟良蘭谿人隆慶戊辰進士知秦和如

臯儀徵三縣入為刑部主事謫兩淮運司判官
轉贛州府通判遷知光州有比部集

感興

蟠曲惡木根不植太山岡
婀娜孤生竹抽梢淇水旁
佳人好修飾被服素羅裳
感茲帛雁會得充君子房
絲蘿引長蔓琴瑟淨高張
合懽在令德容色豈足揚

塞下曲

曾隨驃騎度渾河
雨雪天山夜負戈
莫謂歸家貧到骨

黃沙白骨不歸多

張元忭一首

元忭字子蓋紹興山陰人隆慶辛未賜進士第
一歷官左諭德兼侍讀有不二齋橐

杜轄巖訪吳公度

杜轄巖中人曲江舊同席未折彭澤腰
早著東山屐栖心老氏書結廬武夷側
晴峰萬點青雲溪幾條白玄關夾長松
丹房架危壁巖頭露可餐巖下芝可摘
猿鶴時

為羣車馬杳難即我本丘壑人聊作金門客煙霞夙同
好出處偶殊迹諦觀聲利場何似神仙宅四十已無聞
百年亦瞬息徒然赤松子巢居鍊形魄明發出閩嶺題
詩訂泉石

鄧以讚一首

以讚字汝德新建人隆慶辛未賜進士第三歷
官吏部右侍郎贈禮部尚書謚文潔有佚藁

思歸

星河雲氣淡，萸菊露華清。宦况慵兼病，鄉愁斷又生。入秋偏遠夢，逐日計歸程。南鴈空中唳，能禁此夜情。

郭子章 二首

子章字相奎，泰和人。隆慶辛未進士，歷官都御史，巡撫貴州，進兵部尚書。有閩草、留草、蜀草、浙草、晉草、楚草、黔草、草等集。

詩話：青螺散，歷外臺而著書不輟。詩嫌合格者少，然勝於輒熟者多。

紀夢

西南櫓槍明占在川之播何哉井底鼃不知有漢大黔
中久愉恬崇朝忽摧挫聚黨嘯綦江一倡乃百和城市
走豺豺平原起堀堞天子赫斯怒命將出右个猥予在
田間未許支離卧馳驅竹王疆迅速等轉磨夜夢忠義
侯車騎儼相過倒屣延之入席分賓主坐論賊無足虞
糝糠易揚簸巢幕斬偷安積薪以待莖及余入八番次
第密搜邏衝風箨乍卷利七粉同剉豈專帷幄謀一一
神所佐從此半壁天蠻熨始退悞荆祠敬事侯擊牲進

香穠誰為報侯功銘詩我所作

舟中

三春滯水瀆魚鳥狎成羣江濁流新雨山晴斂薄雲村
春幽澗急岸草夕陽薰何處城頭角偏令倦客聞

劉克正 一首

克正字懋一從化人隆慶辛未進士改庶吉士
授檢討

春雪

乍覺輕寒薄太空凍雲舞絮一宵同點來簾幕渾成雨
飛入園林不待風萬里江山春寂寞九重宮闕玉玲瓏
仙郎天下聞高調一曲誰能和郢中

郭子直 一首

子直字舜舉崇德人隆慶辛未進士除行人歷
官福建按察副使

采菱曲

采菱復采菱采采日已暮貪看馬上郎迷卻花間渡

侯堯封 二首

堯封字欽之蘇州嘉定人隆慶辛未進士授刑部主事改四川道御史歷官福建參政有鐵菴遺藁

第一禪林

自是禪栖第一林萬松迴合白雲深遠看麋鹿不知數
欲問禪居何處尋中天日月遞朝暮下界山河自古今
暫憩便疑塵世隔幾人曾此一投簪

詠石牛

田入山鄉少時將孟夏終如何尚高卧不起助農功

劉元震

一首

元震字衍亨任立人隆慶辛未進士歷官吏部
左侍郎掌詹事府教習庶吉士

月下聽琴

明河澹月挂疎林此夕張君綠綺琴一曲正堪清夜聽
幾人先動故園心寒催兔杵霜前響靜愛龍脣泓下吟

流水高山意何限
遙遙天路彩雲深

黃洪憲 五首

洪憲字懋忠嘉興人隆慶辛未進士改庶吉士
除編修奉使朝鮮還進侍讀歷右庶子陞少詹
事掌翰林院事有碧山學士集

觀蘭亭修禊圖

夙昔秉微尚縱情寄丘壑
晞髮秦稽陽俯觀但寥廓
蘭亭被荒丘羣賢不能作
風生松下寒月出雲上薄
觴咏

已無歡墨妙虛有託崇峻迹未殊清朗又如昨彭殤誰
見齊庶幾達者樂

穆宗莊皇帝輓歌

二首

祇德符神禹成功紹帝堯冠裳臨萬國干羽格三苗碧
嶂龍輶入青林鳳翼遙淚痕消不盡斑竹日蕭蕭

魚鑰開清禁鑾車出紫薇忽移丹仗去空憶翠華歸天
路應非遠人寰惜永違霸陵秋色裏愁見白雲飛

山海關

長城古堞俯滄瀛，百二河山擁上京。
銀海仙槎來漢使，玉關秋草戍秦兵。
星臨尾部雙龍合，月照平沙萬馬明。
聞道遼陽飛羽急，書生急欲請長纓。

別許都監

萍水他鄉聚多君，傾蓋歡九秋。
迎使節千里，送征鞍久客歸。
心切孤亭別袂寒，遠星江上落殘月。
馬頭看豈不懷瓊玖，無因託羽翰。
相思不得見，努力且加餐。

劉虞夔一首

虞夔字直卿高平人隆慶辛未進士改庶吉士
歷官太常寺少卿兼侍讀學士掌翰林院事再
掌詹事府

苦熱行

燕山虛傳千丈雪昔乃苦寒今苦熱苦寒尚可禦苦
熱安所逃寒有重裘奧室足自庇熱雖袒裼心煩勞
炎風吹埃沸四野火雲布空日如赭長安衮衮車馬
塵驅馳道路何為者吾思仙人乃在閭風岑水晶宮

闕琪樹林安得從之御風吟攬子之袖開我襟念此
已足清人心吁嗟炎蒸三伏無歲無發狂大叫胡為
乎

周光鎬 二首

光鎬字國雍一字耿西潮陽人隆慶辛未進士
除寧波推官陞南戶部主事改吏部歷郎中出
知順慶府陞四川副使轉參政遷陝西按察使
擢僉都御史撫寧夏入為大理寺卿有明農山

堂彙草

大梁道上

眺望中原路逶迤入大梁
風塵馳朔騎節序改青陽
衛水浮煙黑沙河落日黃
愁來看短鋏猶帶薊門霜

秋懷

靈關秋色白榆多九月霜
風黑水河天外雁鴻嗟阻滯
籬邊松菊怨蹉跎南來邛塞
無烽燧西去臨洮走橐駝
此日三秦憂不細禁中親詔
出廉頗

吳中行 一首

中行字子道武進人隆慶辛未進士改庶吉士授編修以建言廷杖為民尋起用遷右中允歷洗馬管司業事進侍讀有復菴集

詩話江陵奪情事在萬曆五年七月迨十月之朔彗星見大內火於是既望三日吳公疏上次日趙檢討用賢疏上又次日艾員外穆沈主事思考疏上江陵怒不可止而諸公均受杖矣方杖時鄒進士元標疏復上一時士氣持正若是許文穆以庶子充日講官為吳趙二公餞錫玉杯一銘曰斑斑者何卞生淚英英者何蘭生氣追之琢之永成器以贈吳公犀杯一銘曰文羊

一角其理沈默不惜剖心寧辭碎首黃流在中
為君子壽以贈趙公玉杯今不見犀者為吾鄉
何少卿疑音所得
余嘗飲此作歌

賦得露凝仙掌

絳闕秋容靜金莖露氣長夜深方湛湛日出轉瀼瀼共
喜仙人掌能溥玉女漿願持方聖澤沾灑徧遐荒

史鈞一首

鈞字汝和餘姚人隆慶辛未進士改庶吉士授

編修

春晴

春光二月滿皇州半逐桃花入水流何事王孫歸未得
東郊芳草自含愁

丁元復一首

元復字見心長洲人隆慶辛未進士除知陽信
縣擢山西道御史歷浙江布政司參議有片玉
齋存藁

早春過趙凡夫池館

幽栖何所定，選勝得支硎。
檻底泉鳴玉，天邊石作屏。
江梅依磴戶，谷鳥浴清泠。
千丈原頭瀑，宜添一草亭。

鄭邦福 一首

邦福字洪疇，上饒人。隆慶辛未進士，歷官南京太僕寺卿，有采真遊藁。

牛場坡

俯身牛場坡，仰面臘笏嶺。
白鷄山名帶雨，翔老鴉名入雲。

猛如穿螺竅，中復躋蝸角。
頂行地雖數舍，計天不盈頃。

從來汗漫遊觀茲殊絕景那知陟宦階巖嶮極無影

吳中立 二首

中立字公度浦城人隆慶辛未進士授禮部主事歸籍起尚寶司丞有吳音

浪吟

楚歌鳳兮鳳孔操麟乎麟空為世所瑞胡不全其真三山有若木百歲無故人去覓逍遙子清湘采白蘋

舟行白下

江天澹秋色斜日照孤篷漁艇沿門繫蒹葭到處通鳥
飛帆影外人在鏡湖中始覺煙波叟浮家趣不窮

薛夢雷二首

夢雷字汝奮福清人隆慶辛未進士歷官雲南
按察使有彩雲集

發三山

倦遊萬里欲投閒未斷塵緣更出關七十五程重屈指
夢魂何處不三山

夜次弋陽

風塵何事只栖栖
楚水茫茫去鳥低
落日漸看人影盡
平沙如雪弋陽谿

熊敦朴一首

敦朴字茂初內江人隆慶辛未進士改庶吉士
歷官貴州布政司參議有謫居橐

得趙汝師太史書

章臺猶旅食珍重故人書
自是飄零久非關記憶疎
野

花紅更發官柳綠仍舒浩蕩乾坤意吾生總不如

馮時可

七首

時可字敏卿松江華亭人隆慶辛未進士除刑部
主事改兵部歷員外郎中出為貴州提學副使再
補四川提學副使調廣西湖廣參政有北征西征

金閭石湖巖棲雨航等集

陳卧子云吾鄉元成可方吳門劉子威

詩話元成詩就全集而觀甫田彌望稂莠汙菜
獨五古一體尚有遺秉滯穗可供捃拾以比劉

子威翻
覺勝之

齋居雜述 二首

兔狡能營窟鳩拙亦居巢兕虎入帝苑麒麟走空郊玉
石貌難分金錫質易淆三黜不必愚九遷豈必豪屈伸
由好惡人生在所遭鴻也費歌噫雄也費解嘲何如與
化遊小大並逍遙

白龍下清淵漁者射其目白龜使清江卜者剝其腹元
君違神夢上帝惡魚服風波一失所雲雨迷牽復芳草
化為芻苦菜菹為蓄世事如轉蓬人情多反覆冉冉百

年中愁居何能淑

戊戌歸田雜感 二首

箕斗不共垣有采相為光
蘭蕙不共根有氣相為芳
奈何同居者各自生肺腸
一笑亦見疑片語含鍼鏗
不能相慰勞安望相頡頏
長林知天風大埜知天霜
人生不相知何用接杯觴

北風何其涼霜霰相與期
薄暮侵衆卉芳鮮漸已辭
玄髮不堪秋忽覺變青絲
翩翩飛蓬征愴愴遊子思
浮雲

一出山安知其所之故交皆已貴故心誰為持酌水置
金壘焉辨澠與淄

送張孝豐

浮雲不可駐遊子不能留驚飈逐駭駟歲月去何遒禦
寒安得表濟河安得舟客處無與懽寧不思故丘

常山道中遇雨

東山詠零雨感彼歸途事今茲賦愁霖行役我伊始霖
靈業不堪滂沱末由止慚慚石彌高油油雲未已我車

淖方掀我僕顛莫起蝟蝟蒸桑肅肅鴉集枳苦哉遠
征人重山復重水

建陽道中

趨程苦行遲遇景苦行速清晨發建陽重霧若雲簇載
馳且一舍始能豁我目清溪映明沙茂樹間修竹千山
開且合煙翠爭相逐飛梁若垂虹去艇如遊鷺竟日抵
甌寧應接難更僕人遠意如何良遊偏恨獨

方揚一首

揚字思善歙人隆慶辛未進士歷官杭州知府
有初菴藁

金山

虛閣疑無地琳宮別有天江空萬籟發僧定一燈懸七
澤吞吳楚孤峰自歲年乘風興不淺高眺已泠然

劉伯淵一首

伯淵字靜之號念庭慈谿人隆慶辛未進士除
秦興知縣遷工部主事歷員外郎中出為江西

按察副使以病致仕歸年百餘歲卒有灌息亭集
詩話念庭於隆慶五年釋褐萬曆十六年即引
疾歸其八十初度自嘲詩云謂我歸田早假令
不早有何好幾人欲歸不得歸黃犬東門添懊
惱謂合彈冠出陶令折腰八十日投閒已道宜
休三揣分真成不堪七及百歲思陵遣御史梁
雲構存問念庭猶健步迎於門外謝恩畢騰觚
飛爵了無倦容崇禎十一年事也吳興有顯者
家居以厚幣乞言介壽念庭笑曰七十上壽母
乃太早乎浙東西
相傳以為佳話云

園居

松際茅簷隔小橋水濱穿圃亦通潮得閒獨坐翻書卷

有客相過慰寂寥方竹歲深裁作杖大壺霜落剖為瓢
年豐飽喫青精飯莫問仙山路近遙

吳丕顯一首

丕顯字希文松江華亭人隆慶丁卯舉人承天
府通判有四留軒集

詩話希文奕葉青門一官散吏廉能著聞相傳
初補學宮弟子製青苧布為襪衫授兄子太僕
炯以及孫曾家有青苧亭至今存焉襪衫之製
諸生服之洪武二十四年三易其式而後定用
玉色絹布為之寬袖皂緣繫絲垂
襦其後漸易以藍罕用布者矣

題襟江樓

纜解春江曉帆懸
碧樹秋開窗千里
月近檻一江流
草色迎芳渡歌聲
逐去舟十年湖海
夢猶自媿沙鷗

鄭學醇 一首

學醇廣州順德人
隆慶丁卯舉人選
授知縣有
勾漏草

園居

藥裏供垂老
幽棲性獨偏
每尋高士傳
無復遠遊篇
柔

卷五十六
櫓村煙外寒江夕照前沙鷗我與汝相對可忘年

劉元卿 一首

元卿字調甫安福人隆慶庚午舉人徵授國子
監博士遷禮部主事有山居草

別王以忠

王粲樓前賦梁鴻廡下居死生奚不可歸去復何如計
日浮炎海經時返故廬憑將越溪水還寄八行書

梁 岳 一首

岳廣州順德人隆慶庚午舉人官知州

暮春燕京懷歸

長安春盡落花多
越客思歸意若何
節序幾從愁裏變
家園頻向夢中過
西京形勝雄三輔
北雁音書隔九河
燕市酒鑪堪取醉
莫將留滯起悲歌

明詩綜卷五十六

欽定四庫全書薈要卷二萬五百三十

集部

明詩綜卷五十七

翰林院檢討朱彝尊編

李應徵

三十首

應徵初名衷毅字伯遠嘉興人萬曆癸酉舉人
選授臨安教諭陞南國子博士有青蓮館澄遠
堂偶寄軒藿園寄茗薊易河梁兩都汗漫遊諸

集

皇甫子循云伯遠肆力風雅律詩時似少陵
而風骨師心太白 彭子殷云伯遠詩頓挫

激昂跌宕飛舞若鞭赤虬轡蒼螭而上下彩虹碧落之間 鄧遠遊云伯遠意取師心法必摹古其

於諸體無所不工亦靡所不合 黃貞父云伯遠詩雄沈俊爽如驃騎之師不設刁斗而肅然不可

犯 鍾廣漢云先生早察孝廉以才望自高既艱於一第老就四門博士其詩取材開寶匠法弘正

是時七子之習變為叫呶公安之派漸已淫永先生激彼頽波力返正始閎麗悲壯卓然成家

靜志居詩話弇州標榜前後五子而外廣為四十子若似乎此外無遺賢矣說詩者遇隆萬朝士或

置不觀直以公安景陵繼七子之派即遵王之論亦不免焉不知隆慶諸臣已力挽叫囂之習歸於

平澹而定陵初年人皆修辭琢句出入風雅之林若吾鄉李先生伯遠若下鄭先生允升吳中歸先

生季思嶺南區先生用孺尤卓然名家而閩中徐惟和謝在抗曹能始均不為楚咻所奪未見萬歷

初之不及嘉靖季也學者取諸家詩誦之庶幾論世有權衡矣

吳門逢袁履善先生却贈

涼風起蘋末落日開中園寒蟬聲嘒嘒飛鳥何翻翻
顧逢雲間叟而同江上言我昔與君別遠涉長水原
今日復見君乃在吳閭門閭門鬱雲興流焮激飛軒
攜手登茲樓時以散憂煩明月皎夜光有酒盈我尊
開尊飲君酒寸心聊復論丈夫重意氣迹遠道自存
何必齊年齒然後情誼敦願將結佩贈媿無雙
人瑜璠

八月十四夜赴沈中丞純甫約與范倩東生泛月
之茗上

顏照忽已匿閒夜增離情涼風扇薄帷白露塗中庭詠
彼蟋蟀唱眷言懷友朋佳期及三五圓景將漸生素書
忽見招方舟驚前汀薄煙斂層霄皎月雲間升驚鵲既
飛遠來鴻亦哀鳴流輝照衣裳坐見秋江澄爽氣蕩瀾
澳冲魄涵虛明屬林方候滿委照知戒盈且勿論居諸
杯酒聊共傾芳洲思紉蘭極浦聞采菱不寐望所歡悠

然見菰城良覲在明發庶以慰深盟

寄御史大夫沈公純甫

誰謂芝桂芳指作施與猶誰謂西施妍而不如宿瘤姬
公避流言孔父蒙麤裘鳳德故不衰仁物竟奚尤睿鏡
有餘照慈杼無妄投亮懷百鍊操繞指非所謀勿以入
故室競彼戈與矛讒口任叟叟鎮之以休休泰山摩蒼
天不辭堙與丘滄海百谷王涓勺鮮棄流桃李故不私
藥籠亦見收交親誼所敦申言副咨諏

題清音閣贈朱君采

君采天下彦乘時奮遼廓身雖在軒冕志不忘巖壑朝
謝桓氏驄暮羅翟公雀結樓臨青茗憺焉守玄漠一水
既當戶衆山亦羅郭俯瞰激清泠仰矚熙崖寧曠然招
遠風蕭疎振林薄并入山水間情境兩寂莫綠尊時時
開清言復間作心期契鴻冥世變付龍蠖達人操其權
神理或可託

秋夜歸自茗水泛月鶯脰湖寄沈子勺

朝辭若下城暮驅笠澤舩景物忽已改川原亦邈緬娛
目惟清暉百里同一眇月出梅堰高水落松陵淺曲渚
屢縈紆環洲迴轉澹澹波生煙遙遙雲沒峴楓林霜
欲丹蒹葭露初泣境會心自恬神曠理逾顯同懷寄秋
水離念得所遣

述感

旭日不照地慘黯東南隅陰風西北來遂與浮雲俱昏
曉不復辨晦明忽須臾雷霆擊高空雨電集階除皇澤

亮已竭天威寧所須戾霄無逸飛逝淵寡潛魚貂璫構
禍患豺虎當路衢宇宙雖云邈吾駕將安如

武夷吟為叔平姪賦

浙水猶未渡閩山安可越夜夢武夷君幔亭弄秋月顧
余莞爾笑相攜叩丹闕薜荔飄衣裾芙蓉墮冠髮吹愁
落空際步虛任超忽陡覺聞天雞明星高兀兀九曲杳
然失對汝清興發安能涉世網生死遞淪沒何當乘飛
霞揮手謝仙骨

舟過松陵沈子勺邀同顧別駕王半刺諸公宴集
作兼呈長公伯英

扁舟遡廣澤蒹葭浩蒼蒼芙蓉被江堤間以秋蘭芳恍
如覲容儀曄曄舒其光美人忽見招忝竊登斯堂余遊
伯仲間常恐不得當匪云託肺腑所恃道誼長市交若
春華改葉隨秋霜苟能抱微衷乖離亦何傷所以一水
間落穆如相忘豈謂山澤臞無意偕巖廊跡遠心不遐
斯意兩不妨樂哉此良會周親情所康肴來俱異味酒

至無返觴新聲奏逸響妙伎呈中央主人詞壇雄樂府
兼擅場曲誤必屢顧按節知宮商此中有妙理奚必非
文章世多混真贗誰別否與臧吾將託優孟抵掌以徜徉

雜詩二首

所居雖塵市其後即我園三周水繞之水流何潺湲灌
木旣羅戶密篠亦當軒境近心獨遠悠然忘世喧夜枕
鳴谿漁曉窗聞鳥言病不廢杯酒時時亦開尊適意不

在醉聊託餘生存

人生歡日少戚戚恒多悲每憂此身沒身後無所遺所
以百年中役役無已時生時不行樂死復安所知墳墓
且不保智愚豈所期及此有盡軀壺觴聊自持秋雨日
以深秋草日以滋嚴霜倏將至不樂欲何為

長水雨中送董君謨還四明

谿雲壓林林氣黑長河黯淡無顏色大舩驅來笠澤風
一片歸帆雨中濕送君此去歸舊山東湖之水流潺湲

四明崇峰二百八一一峰尖如黛髮董生瀟灑磊落之

才亦如此對之可以開神顏我歌四明送君酒何惜相

逢暫攜手便應喚汝董糟丘酒池之中可拍浮盡掃爾

我坎坷抑塞之窮愁丈夫意氣自有主為蛇為龍何足

數無錢但須典鷓鴣有酒便能賦鸚鵡少年得意多挪

揄卻笑乃公爾何苦仰天大叫白日徂腐鼠那可驚鵠

雛男兒世間何事不可作但不能以此七尺為侏儒功

名富貴可以赤手博摧眉俛首胡為乎世人聞之皆掩

耳董生之前可語此酒闌歌罷君發船我亦還家渡長
水

歷陽

聖祖開基日淮南即舊邦六龍飛采石萬馬渡橫江豪
傑爭挑戰轅門已受降雲山凝望處彷彿見旌旂

項王廟

落日陰陵道悲風百戰原當年意氣盡四面楚歌喧子
弟軍誰在春秋廟獨存江亭艤船處悽惻不堪論

橫江

日落海雲起蒼茫倚棹看橫江不可渡秋水正漫漫夾
岸青山出孤飛白鷺寒當歌有明月對酒莫辭乾

江行與蘇生別

葭莢正蒼蒼緣流水一方平沙連極浦斜日上危檣坐
惜故人別因悲江路長行行秣陵近回首各他鄉

人日峴山遣興

人日人為客春風春可憐煙波浮宅遠丘壑寄情偏柏

葉烏程酒椒盤下若鱗如從習池飲醉卧岷山前

正月十六夜畢孟侯至

春草忽已綠春潮寒到門喜從新雨後得共故人言小
婦調中饋殘燈續上元庭梅未搖落還擬數開尊

送沈嘉則之天台訪道士

秋水看疑合秋聲聽不分此時四明客去謁三茅君洞
壑深藏日峰巒盡入雲蒼茫煙樹裏笙鶴幾回聞

廣陵送張孟奇

乾坤同作客千里任飄蓬
况復離亭別蕭條落照中
濤聲揚子北寒色海門東
去去煙波外無為歎路窮

送萬和甫歸里

亦知非遠別還復念孤征
行色江天樹歸帆水國程
北風吹斷鴈九月豫章城
到日深愁汝淒其倦客情

聞王師東援朝鮮

材官十萬欲平倭司馬何如漢
伏波殺氣曉連元菟郡
將軍夜渡白狼河還須直破伊岐島
莫使虛傳杵杜歌

禮樂東藩箕子國王師急為洗干戈

金山紀事

西來邊警日倉皇東望烽煙漲海黃持節不煩蘇屬國
和戎誤聽漢中行遂令綸綍虛丹鳳翻引旌旗指玉狼
莫道朝鮮猶未靖急將戈甲禦遼陽

送康元龍還閩時歸自海上

書生尊俎笑談兵幕府還聞倒屣迎九塞昔曾驅馬度
五湖今許放舟行海天雲樹無諸國客館鶯花樵李城

莫道倦遊歸計拙春風應念倚門情

重送萬和甫還江西

去歲今年兩度回寸心遙指白雲隈城頭擊鼓天未曙
江口候潮船正開望望美人南國遠淒淒孤雁朔風哀
來朝此地看山色愁絕還登百尺臺

春懷

衡門過雨淨疎簾愁對春江淚共添萬戶耰鋤連海岱
三苗戈甲遍巴黔和戎自詫長城險御馬誰知朽索織

杞國憂懷殊不細
起看林月步虛檐

舟中眺雪

俯仰迷江甸
東南凍未蘇
扁舟下遠水
積雪斷寒蕪
朔氣連滄海
窮陰混太湖
瀟瀟兼霰密
脉脉受風扶
大地遙浮越
低空近壓吳
山川紛莽蒼
雲木半虛無
鴈路纔分影
鷗沙祇辨呼
戢鱗潛素鯉
側目逗饑烏
色借齋宮竝
音操郢曲孤
披來朝練淨
映處夜珠枯
不用裁梁賦
偏宜入剡圖
乍驚容鬢似
卻怪歲華徂
臘漸回杓
斗春

先到酒壚乾坤原浩蕩
泥滓暫崎嶇自笑寒暄態誰燃
造化鑪聖朝陽德在白日麗高衢

浪口渡

柳風吹浪花谿雲澹無色
偶此爭渡人日夕未遑息

煙霞洞

古洞鴉路深杳渺不知處
忽見煙雲來疑從此中去

館娃宮

不嗟亡國餘而憐竒豔
絕翻得捧心人吳宮名未滅

十八夜宿煙雨樓初見月

雨氣連朝夕湖雲濕未收
今宵看月色始覺過中秋

姚舜牧 一首

舜牧字虞佐烏程人萬曆癸酉舉人廣昌知縣
有承菴詩集

詩話承菴以厚德聞鄉里事難悉書研
究六經各有疑問詩不專工然頗自喜

自君之出矣

自君之出矣妾守深閨裏
花落委泥中誓不隨流水

林章

十七首

章先名春元字初文福清人萬歷癸酉舉於鄉

有林孝廉集

謝在杭云孝廉桀驁不羈才情楚楚信是可是人曹能始云初文才

士不欲以庸孝廉自處好為人排難解紛乃以無心獲罪謝司寇出之縲綽之中適遼海有警累上書進奇策願身列戎行鍊甲兵備緩急為嫉者所繩觸憲而死詩如客情如春草無處不堪生無家逢寺好多病見僧親曉烟常帶雨夜月忽啼禽千山風雨裏一任子規啼皆絕酸楚

周元亮云初

文才情悽惋

少年行

君不見長安俠少年酒底高歌花底眠
鬪雞走馬千金散何曾盜箇官家錢
一朝忽報邊烽起從軍不待別妻子
但言割地與和親不愁戰死愁羞死

春日送別

春風自多思奈與客情違楊柳頻催別
蘼蕪不送歸千山獨上馬一曲兩沾衣
回首河橋道迢迢看落暉

吐漿臺弔淮南王英公

孤祠千載後不是漢人開劉項俱天意
韓彭只將才九

江殘水過六國故山迴惟有啼鴉在黃昏下此臺

舟中別張仲豫

昨日淮陽客今朝江上還離亭一杯酒去棹萬重山雲
樹故人意風塵游子顏未知攜手處莫惜暫追攀

暮春登燕子磯懷古

揚子江南燕子磯楊花燕子一時飛六朝人物空流水
兩晉山川盡落暉草色遠迷瓜步去潮聲暗打石頭歸
倚闌天際春三月惆悵東風動客衣

陳漢陽同年招飲晴川閣應城田功甫孝廉適攜
酒至余於功甫為初識而別漢陽則十年矣時當
七夕書以記之

木葉西風漢渚波高樓徙倚晚涼多十年易作人間別
七夕難為客裏過陳子榻前堪對酒田郎座上好彈歌
孤城漏下雙星見牛女娟娟正渡河

鄖城見黃序賓使君

雲雨交情此日偏與君相見可潸然豈無太守二千石

那有故人三十年冠為王陽彈不忝袍因范叔脫堪憐
舊時一片灤城月何似今宵漢水前

潛山送友還閩

草草相逢楚澤西紅亭綠酒又分攜人生底事憐雞肋
客路長教怨馬蹄舒子州前檉葉暗越王城外荔枝齊
十年歸夢如流水一夜隨君下建溪

送別

相送到江干淒其風又雨淚下沾君衣看君不能語

夜度恨這關

楚水東邊別路多
秋風夜半動離歌
迢迢恨這關前月
獨照行人過汴河

河水 二首

河水灣灣遠大堤
堤邊楊柳一時齊
可憐折盡青青色
長送行人出水西

河水漫漫日夕流
流將清恨到青州
不知郎在青州不
妾在河西西盡頭

豔曲

百花臺上百花開
妬柳驕桃一處栽
惟有東風情最好
桃邊吹過柳邊來

憶仲姬

逢時把酒對紅顏
親為拈花插翠鬟
今日登高人萬里
教伊獨上望夫山

春日

春城柳色入東華
莫惜驂騑過酒家
記得去年江上別

風吹二十四橋花

渡江

不趁東風不待潮
渡江十里九停橈
不知今夜秦淮水
送到揚州第幾橋

元旦

千官春珮擁朝班
萬國歡聲動聖顏
獨有縲臣無祝處
隔牆遙拜孝陵山

孫繼皋 六首

繼皋字以德無錫人萬曆甲戌賜進士第一歷
官吏部左侍郎有柏潭集

山中

山中無棟宇小屋但誅茅境僻人煙少
林深虎迹交暗泉通石竇炎日避松梢
寂寞元吾事披襟誦解嘲

立秋日病

伏枕仍今夕開軒乍已秋高梧片葉落
大火一星流楚戶砧初動齊紈扇欲收
因思故園鱸強起賦登樓

琴

十月彗星見一旬
光丈餘銀河不可掃
天意欲何如
避殿君王詔登臺
太史書杞人憂國淚
占夜幾踟躕

送周計部餉邊

大漠平連薊北天
向來前箸急籌邊
將軍已佩通侯印
使者仍輸太府錢
幾處鼓鼙閒落日
何年烽火避甘泉
君行會有匡時略
試問金城塞下田

丙子春夢得一聯足成一絕

落日船頭浪春風江上山
家園幾千里卻向夢中還

芙蓉湖

芙蓉湖邊楊柳斜
家家啼鳥村村花
水面歌兒搖畫舫
陌頭游女渡香車

余孟麟一首

孟麟字伯祥江寧人
萬曆甲戌賜進士第二
歷官南京國子監祭酒
有幼峰學士集

多病

多病門常掩深秋葉盡飛自憐初學廢遂覺故人稀
鑷白心虛壯還丹計實非不堪風露色猶著芟荷衣

孫鑛 二首

鑛字文融餘姚人萬曆甲戌進士歷官太子太保南京兵部尚書有居業編

詩話月峰勤學過於士安慧業不如靈運觀其論詩有云韓退之於詩本無所解宋人目為大家直是勢利他爾是何言與尸佼所云松柏之鼠不知堂密之有美樅者也

雨

漠漠雲籠閣霏霏雨拂簷彈琴絃半緩收扇墨多黏古
礎方花潤高枝墜果甜此心無俗慮屋漏亦何嫌

舟行

天陰村逕黑渾迷舊時路忽逢岸上燈照見橋邊樹

趙南星 八首

南星字拱極高邑人萬曆甲戌進士除汝寧推
官入為戶部主事改吏部歷員外郎中謫平定
州判官起太常寺卿尋陞工部侍郎拜都察院

左都御史進吏部尚書謫戍代州卒謚忠毅有

趙忠毅公集

姚孟長云夢白詩淋漓沈痛讀之如聞易水擊筑之音

雜詩

騎馬出城門攬轡登高岡秋風凋百草原野何荒涼
離獸縱橫馳飢鳥鳴且翔四望多古墳蕭蕭蔭白楊
結根連枯骨落葉滿墓傍泉室永寂寞無復白日光
今古更相悲奄忽若朝霜髑髏樂南面無乃非其常
修名苦不立死亦何足傷

宿雨

宿雨苦不開，四望垂雲黑。塗潦浩縱橫，阡陌不可識。客
子駕言邁，行行還自惻。薄暮路轉脩，人馬同倦極。高空
絕飛鳥，况我無羽翼。遠壑來悲風，草木慘無色。念彼白
駒詩，喟焉長歎息。

聞陳荆山方伯病免

解組亦常言，斯人何其果。纔見北來鴻，俄聞南下舸。故
人俱還山，酒錢誰寄我。嗟彼四海人，何限不舉火。拯物

豈不懷仕路方坎坷同心眇天末難鼓山陰柁酌我犀
角杯遙思澆磊砢

余曾寄荆
山犀杯

壬子仲春與梁升吉徐新周汪景從吳昌期及其
子貞復遊泚上取水烹茶

命侶遊南郊乃至泚之干春風澹未放薄衣尚微寒水
落出平沙中為新月灣抽蒲此偶坐西睇太行山淺流
開明鏡綺波生其間童子負茶鼎烹之瑩心顏自有泚
水來勝事良絕難俗人既無韻雅人未必閒我輩幸免

俗世務不相關濁河衆魚噉夙志非投竿

庚戌立夏日

早氣翻涼冷司方改祝融家家田望雨日日土兼風轉
壑非能盜開倉未濟窮已知天意久不肯遽年豐

燕子

漸見年來燕子稀香泥何處戀忘歸竹亭草閣簾虛卷
樹杪雲邊影乍飛社日屢看時節爽舊巢忍與主人違
蕭條景物殊疇昔歎息林中事亦非

寄艾卿

懸瓠城頭坐日斜，目隨鴻雁極天涯。
祁連風卷沙如霧，瀚海春飛雪作花。
擊筑可憐燕市月，鑿空虛擬漢臣槎。
已拚萬死投荒塞，豈望金雞更憶家。

寄象先兵部

長安歲晚雪霜頻，林下應知忘故人。
此日音書那不寄，銀魚冬筍未嘗新。

李三才 六首

三才字道夫臨潼人萬曆甲戌進士除戶部主
事歷員外郎中謫東昌推官陞南禮部主事轉
郎中出為山東按察僉事歷河南參議副使調
山西入為大理少卿擢右僉都御史督漕運拜
戶部尚書有雙鶴軒鷓鴣軒二集

秋夜宿直

十載猶郎署蹉跎媿少年涼風迴樹杪白露下庭前漏
度三更雨燈殘五夜煙由來飛動意回首欲茫然

送許郎中轉餉薊密諸鎮

重鎮經行遠，清秋離別難。
和戎兼漢策，轉餉命秦官。
朔鴈驚風下，邊雲入夜寒。
都亭尊酒罷，落葉滿征鞍。

送姜仲文之徐州

轉餉君之楚，為郎我滯燕。
一尊悲遠道，並馬憶朝天。
雲失西山樹，江迷大澤煙。
相思若汴水，日夜咽君前。

送馬心易被謫南還

風雨金陵暮，蕭然逐客舟。
酬恩空一劍，去國正三秋。
岸

閣青楓遠江深落照愁五湖知有興只此又何求

和李茂才春日見寄

滿路生芳草歸心羨馬蹄何當明主棄遂作故園栖
梅柳愁爭發山河望轉迷忍貪朱紱貴一任白頭低

送諸博士壽賢量移過里兼懷顧叔時兄弟時方
有洮岷之警

秦關西望壯心驚風雪梁園送汝行漢帝有恩前賈席
書生何計請終纓金縢歲月翻挑釁宵旰朝廷已論兵

若到江南逢二顧安危萬里想同情

李化龍 五首

化龍字于田長垣人萬歷甲戌進士除嵩縣知縣陞南京工部主事歷郎中改吏部出為河南提學僉事轉參議遷山東提學副使轉河南參政入為太僕少卿陞右通政以右僉都御史督川湖雲貴以工部右侍郎督河道入為兵部尚書加少保晉少傅兼太子太保卒贈太師謚襄

毅有李襄毅公詩文彙

詩話于田詩雖沿王

李餘波然頗爽豁

古行路難

君不見鳳凰臺前人已去後人來又不見長干里昔時
樓榭今荆杞白雲蒼狗只須臾世間反覆何所無衛青
未遇平陽奴衛青既貴平陽夫萬事無如眼前好守株
待兔何為乎

秋日飲張司理

關河秋色晚蒼蒼江畔逢君更憶鄉海內弟兄多意氣
天涯雲物總淒涼三山木落啼猿急八月風高旅雁長
此夕燈前拚盡醉故人明日櫂相將

登醫無閭山

天柱高標九域東振衣萬里受雄風雲煙低擁黃龍府
日月高懸黑帝宮截海帆檣來徼外防秋士馬下回中
分明半壁歸撐拄合有明禋禮上公

題清苑涇陽驛壁

二首

短牆小屋柳垂垂二十年前此咏詩今日重來無覓處
空餘烏鵲繞寒枝

南去北來枉自嗟閒愁贏得鬢生華數行遺墨猶難保
何況元都觀裏花

謝杰 二首

杰字漢甫長樂人萬曆甲戌進士除行人歷官
戶部尚書有北窗吟藁

煌煌京洛行

煌煌京洛維帝之鄉地交陸海人雜五方物態千狀靡
可籌量炙手可熱死灰或颺清商回換六月飛霜翟公
門第雀羅條張衛青僉僕夕拜侯王黃金作埒白玉為
堂東鄰施戟北里鳴璫鄠杜惡少邯鄲名倡徵歌百萬
縱博千場時不可再樂不可常悠悠南陌累累北邙東
望上蔡西望咸陽黃犬既斃狡兔亦僵有德以昌無德
以亡周公之訓懍如探湯

死馬行

月月橋門進草束千束萬束猶不足朝朝死馬出橋門
五匹十匹紛相屬馬草日進馬日飢馬飢日死人日肥
圍人圍人馬用爾輩為草人上草將錢買屠夫領馬作
肉賣賣馬肉輸圍人馬死何能值幾緡有時草人轉向
圍人買得死馬草明朝又進橋門道

呂坤 三首

坤字叔簡寧陵人萬曆甲戌進士知襄垣大同
二縣為吏部主事歷員外郎中出參政山東按

察山西轉陝西右布政以右僉都御史巡撫山
東陞刑部侍郎有去偽齋集

雜詩二首

野水漸我車掀之出於淖夫豈避危途行險終違道萬
事有當然禍福安足保君子守其轍無論遲與早孔孟
恒固窮儀秦母乃躁所得非所欲寧以落魄老

土偶象為人終復化為土物化還吾初此身了無苦自
予落蓐時覺饑寒痛楚不幸漸有知六氣滋外侮逆境

不須論快事奚予補勞勞空百年孰注南宮簿

別意

留妾一身在憐君萬里行夜來雙泪盡不忍到長亭

徐元春 一首

元春字正夫松江華亭人萬曆甲戌進士歷官

太僕寺卿

靈谷寺訪月泉禪師

山郭尋僧出行行黃葉邊石泉秋聽急江月坐來圓興

豁長昏夜門開不住天時聞鐘磬發獨立萬峰前

楊四知 一首

四知字元述祥符人萬曆甲戌進士除行人擢
陝西道御史歷大理寺少卿

高玄殿

高玄宮殿五雲橫先帝祈靈禮太清鳳輦不來鐘鼓靜
月明童子自吹笙

邢侗 四首

侗字子愿臨邑人萬曆甲戌進士除南宮知縣

徵授監察御史出為湖廣參議陞陝西行太僕

少卿有來禽館集

史紹卿云先生能文能詩能書能畫叢會諸長擅絕兼品

詩話子愿雖有詩名為書法所掩其言曰詩盛於嘉隆七子以為盡詞人之變矣然效趨者高趾促柱者急張往往不病而呻吟匪樂而強笑江河日下七子之盛七子之衰也蓋深中時流之弊特其自撰不見脫穎耳

竹馬歌為濟南太守樵李沈公作

使君五馬馬五色兒童竹馬馬以百朝朝遲公阡與陌

胡為不夙來令我父兄頭漸白

起居宗伯尊師于公

七上書移疾三經月改弦臣心霜露切帝命起居駢去
住違今日遲回易長年獨餘秋夕夢常繞汶陽田

走筆戲贈萬伯修使君

五花番馬鸛鶴裘夜獵歸來興未休教唱西涼新樂府
一時霜月遍幽州

古意再寄子田

零落鈿蟬出漢宮
闌干雙淚背春風
君王總署迴心院
再畫蛾眉恐未工

周宏禴一首

宏禴字元孚麻城人萬曆甲戌進士除戶部主事
謫無為州同知陞順天通判復謫代州判官
遷處州府推官轉南兵部主事歷尚寶司丞進
少卿三黜為澄海典史有澄海集

乙酉貶代州壬辰貶澄海俱旅宿高碑店

風塵何處問銜盃
南海浮槎更可哀
古道垂楊應笑客
逐臣何事又重來

游

朴
三首

朴字太初福寧州人萬曆甲戌進士除成都推官入為大理評事官至湖廣右布政使有藏山集

行役

驅馬上高山
山高欲近天
及到山巔上
更有山在前
高

山豈有盡客行良可憐

木綿菴

淒淒木綿菴賈相此裂腹矯矯鄭虎臣手代天行戮戮
死頗快人所恨死不速元兇僅就誅宋社亦已屋蒼生
尚含憤未得食其肉一夫恣胸臆九有被荼毒生竊片
時歡死作千世辱寄語當路兒此是前車覆

崇寧縣卻酒

崇寧清酒如鬱金主人長跪留客斟客行欲飲迫程限

不飲傷此主人心
春花爛漫遍山壑
把酒澆花殊不惡
客還有酒應留連
只恐山花已零落

范涑

一首

涑字原易休寧人萬曆甲戌進士除南城知縣
入為刑部主事歷官左布政使有水堂吟

浣花溪

百花潭接浣花溪
饒笑堂開傍水西
新綻天桃帶微雨
輕飛柳絮半沾泥
尋芳力倦年非壯
懷古愁多日欲低

回首白雲家萬里深林偏喜杜鵑啼

鄒迪光 六首

迪光字彥吉無錫人萬曆甲戌進士除工部主
事歷員外郎中出知黃州府陞福建提學副使
左遷浙江僉事調湖廣提學僉事有鬱鬱儀樓
調象菴始青閣諸集

詩話彥吉詩材庸熟望而
生憎絕句差清婉可誦

行經舊院

曲房深院草萋萋不見嬌鶯滿樹啼
惟有秦淮舊時月夜深相送板橋西

沈淵淵置妾金陵為作花燭詩

蘭釭四照月痕新繡帳牙牀疊錦袖
不羨鄰家金作屋請看夫婿玉為人

賦得西湖柳

一種腰肢浥露妍湖光占得倍堪憐
縱然春盡須飄泊只在瑤箏錦瑟邊

西湖竹枝詞

杏子單衫窄地長裙拖八幅石榴香只知此日遨遊好
不信蠶家四月忙

澄江舟行

夕陽秋色布帆懸霜葉霜花送客船雨過鳥啼多竹外
月明人語在沙邊

逐臣

梳榔木落嶺猿啼瘴海蠻煙路欲迷回首銅駝三萬里

不知何日下金雞

朱期至 一首

期至字子得蘄水人萬歷甲戌進士除戶部主
事歷員外郎中終懷慶知府有王屋山人集

送蔣太守之瓊州

五羊南去客星孤銅柱遙分使者符為語越裳諸屬國
清時不用貢珊瑚

沈 璟 二首

璟字伯英吳江人萬曆甲戌進士除兵部主事
改禮部轉員外復改吏部降行人司正陞光祿
寺丞

擬古答澤民

客從遠方來遺我一紈扇上有秋風詞讀之淚如霰
颯懷袖間悠悠異鄉縣會面詎有期涼燠代更變莫以
新相知棄捐故與賤

酬澤民見懷之作

何來雙鯉漢江頭
江水西南萬里流
高枕青山家負郭
開襟白日賦登樓
洞庭葉下孤雲晚
夢澤寒深五月秋
珍重芳蘭堪作珮
湘臯搖落不須求

陶允宜 六首

允宜字懋中會稽人萬曆甲戌進士除刑部主
事官止黃州府同知有鏡心堂集

蘄簟

簟出蘄州世所無
五月六月繩牀鋪
恍坐水閣眠冰壺

皇都炎熱逾江湖貴臣催篳如催租民情誰語州大夫
蘄艾

七年之病三年艾起死回生人所賴芄芄白葉功為最
麒麟山上王城在索取其中卻其外出入頗煩闔者怪
何時斷種出野菜火病筮痕兩無害

蘄蛇

花蛇方頂尾甲指捕者剖腹投之水自脫腹胃淨如洗
大如竹箭長尺咫能卻風孿化食痞方其出穴疾如駛

偶遭毒吻人立死我節食飲慎眠起諸邪不侵病良已
斲龜

千年龜小象圍棋其甲翠綠毛毯總置之盆水生漣漪
蚊蠅遠避塵自離壁頭牀足兒曹嬉不飲不食長如斯
求之艱難誰得之

麻城鵝

麻城鵝品光州右餌以膏粱兼菜豆肉色紅鮮滋味厚
取之為鮓進元后近年黃州失耕耨一鵝之肥幾人瘦

黃陂葛

楚人種葛不種麻男採女績爭紛拏黃陂所織尤精嘉
光潔勻細眼不斜皎如白苧輕如紗進之內宮傳相誇
雲綃霧縠無光華價值減少尺幅加織者十家逃九家
支大綸一首

大綸字心易嘉善人萬曆甲戌進士由南昌府
學教授陞泉州府推官謫江西布政司理問遷
知奉新縣有華萃集

信州公署

玉露楓林旅雁寒
綠蕉分影入雕闌
自憐兩度來江右
不是閒官即冷官

韓子祁一首

子祁字心堯平湖人
萬曆丙子順天鄉試中式
除德安推官補贛州
歷蘇州府同知有醢雞集
煙雨樓

層樓百尺點空濛
東指蓬壺一葦通
春雨自添湖上碧

晚霞輕抹浪頭紅萬家煙火浮天外
午夜星辰落鏡中
醉坐漁磯還獨酌却將鴛渚作鰲宮

龐一德一首

一德字與虔南海人知府萬子萬歷丙子舉人
嘉魚知縣教授揚州有雙瀑堂橐


山家

入山亦已深居人一何稀
百里三四家茅茨枕山陂
斫山木葉餉食道邊藜
斜日羣行汲漏下未得歸
籬門

鹿眼疎所憂虎與羆居人已偃卧何由知客悲

明詩綜卷五十七

謹案卷五十六第四頁前六行楚楚舊作丑丑今
改 後四行伊蘇特穆爾舊作亞失帖木今改
五頁前三行托和齊舊作脫火赤今改 前八
行奇爾舊作雞兒今改



總校官庶吉士 臣 張能照

校對官庶吉士 臣 嚴 福

騰錄監生 臣 陸學稼

財團法人 佛陀教育基金會 釋淨空 敬

